

हस्तिनापुरकल्पः ।

२७

१६. हस्तिनापुरकल्पः ।

सिरिसंति-कुंथु-अर-मल्लिसामिणो गयउरद्विष्टं नमिउं । पभणामि हत्थिणाउरतित्थस्स समासओ कप्पं ॥१॥

सिरिआइतित्थेसरस्स दोण्णि पुत्ता भरहेसर-बाहुबलिनामाणो आसि । भरहस्स सहोयरा अट्ठाणउई कुमारा । तत्थ भयवया पवयंतेण भरहो निअपए अहिसित्तो । बाहुबलिणो तक्खसिला दिण्णा । एवं सेसाण वि तेसु तेसु देसेसुं रज्जाइं दिण्णाइं । अंगकुमारनामेण अंगदेसो जाओ । कुरुनामेण कुरुखित्तं पसिद्धं । 5 एवं वंग-कलिंग-सूरसेण-अवंतिमाइसु विभासा । कुरुनरिंदस्स पुत्तो हत्थी नाम राया हुत्था । तेण हत्थिणाउरं निवेसिअं । तत्थ भागीरही महानई पवित्तवारिपूरा परिवहइ ।

तत्थ सिरिसंति-कुंथु-अरनाहा जहासंखं सोलसम-सत्तरसम-द्वारसमा जिणिंदा जाया । पंचम-छट्ठ-सत्तमा य कमेण चक्खट्ठी होउं छखंड-भरहवासरिद्धिं भुंजिंसु । दिक्खागहणं केवलनाणं च तेसिं तत्थेव संजायं ।

तत्थेव संवच्छरमणसिओ भयवं उसभसामी बाहुबलिनत्तुअस्स सिज्जंसकुमरस्स तिहुअणगुरुदंसण-10 जायजाईसरणजाणिअदाणविहिणो गेहे अक्खयतइयादिणे इक्खुरसेणं पढमपारणयमकासी । तत्थ पंचदिवाइं पाउब्भूआइं ।

मल्लिसामि अ तत्थेव नयरे समोसढो ।

तत्थ विण्हुकुमारो महरिसी तवसत्तीए विउबिअलक्खजोअणप्पमाणसरीरो तिहिं पएहिं अकंततेलुक्को नमुइं सासित्था ।

तत्थ पुरे सणंकुमार-महापउम-सुभूम-परसुरामाइमहापुरिसा उप्पण्णा ।

15

तत्थ पंच पांडवा उत्तमपुरिसा चरमसरीरा, दुज्जोहणपमुहा य महाबलनिवा अणेगे समुप्पण्णा ।

तत्थ सत्तकोडिसुवण्णाहिंवई गंगदत्तसिद्धी, तहा सोहम्मिंदस्स जीवो रायाभिओगेणं परिवायगस्स परिवेसणं काउं वेरगेण नेगमसहस्सपरिवुडो कत्तियसेट्ठी सिरिमुणिसुव्वयसामिममीवे निक्खंतो ।

तत्थ महानयरे संति-कुंथु-अर-मल्लिजिणाणं चेइयाइं मणहराइं, अंबादेवीए य देउलं आसि ।

एवमणेगअच्छरिअसहस्सनिहाणे तत्थ महातित्थे जे जिणसासणपभावणं कुणंति विहिपुवं जत्तामहूसवं निम्मवंति 20 ते कइवयभवग्गहणेहिं धुअकम्मकिलेसा सिद्धिमुवगच्छंति त्ति ॥

श्रीगजाह्वयतीर्थस्य कल्पः स्वल्पतरोऽप्ययम् । सतां सङ्कल्पसम्पूर्तौ धत्तां कल्पद्रुकल्पताम् ॥ २ ॥

॥ इति श्रीहस्तिनापुरतीर्थकल्पः समाप्तः ॥

॥ ग्रं० २४, अ० ११ ॥

